

■ OR DA LA VITA DA LUDMILLA CAHENZLI

Sco in gangster

Jau sun gist vi dal sbluttar l'oss da mia cotletta e per il solit na ma lasch jau betg disturbar durant questa occupaziun. Ma dal chantun da la maisa, nua che mes figl sesa, aud jau trasor il pled «gangster». Quai ma preoccupescha.

«Quel è voll il gangster.» Mes figl tschantscha cun vusch profunda e sbarbuta latiers.

«Tgi è in gangster?», dumond jau.

El na fa betg stim da mia dumonda e raquinta l'istorgia mo a sia sora. Da ses raquint intervegn jau ch'in gangster cun num Remo va ussa para a scola cun mes figl.

In gangster Remo che va en la tschintgavla classa n'è nagin privel, pens jau e sblut vinavant mes oss – fin ch'jau vegn puspi spaventada.

«Quai è voll-mega-crass-da-gangster!» Questa giada èsi la pitschna che discorra.

Ella ri dad aut. Plaunsieu chapesch jau. Gangsters èn en moda. Ussa ch'jau hai acceptà che tut è «gail», vegn pia il gangster.

Mes uffants han finì da gentar e svaneschan or davos maisa. Jau prend l'oss da la cotletta da mes figl e rui giu la charn. «Gail» pareva l'emprim forsia in pau pervers, ma igl era en in tschert senn tuttina positiv. In gangster percurter engola, cugliuna e mazzà. Pia propi nagut dal bun. Nua finescha nossa societad, sche noss uffants din gangster per insatge lessig u flot?

Jau na vegn probabel betg da scumandar a mes uffants da duvrar il pled, pens jau durant dustar ils tagliers. Ma en l'educaziun na dependi gea betg tge ch'ins scumonda, mabain tge exempel ch'ins dat. Perquai na vegn jau, Ludmilla Cahenzli, mai e pli mai a dir gangster!

Suentermezdi guard jau tras ils catalogs da vestgadira. Jau tschertg giaccas d'en-

viern per la gronda e per il mat. Atgnamain avess jau en stgaffa in mantè che giess quest enviern segir al mat. In bun mantè stgir-blau che ha custà bler. Jau al aveva cumprà e pensà che tuts trais al portian. Ma l'onni passà ha mes figl cumenzà a far tup: «Jau na tir betg en chaussas da mattas!»

Jau sfegl vinavant en il catalog. Tutteninai hai jau in'idea. Jau vom e ragud nanavanti il mantè. El vesa ora tiptop ed ins vesa strusch che la gronda l'ha purtà. Donn e putgà d'al laschar en stgaffa! Jau vom en chombra tar mes mat. «Guarda qua!» Jau tegn il mantè cun bratsch stendi e contemplesch el sco ina miracla. «Quel dastgas ti avair!» Jau spetg tschintg secundas. «Cun quest mantè es ti voll il gangster.»

Mes mat na di nagut. El stat plaunsieu en pe, prenda il mantè, tira en el, va en suler, stat davanti il spievel, chatscha ils mauns en sarg e schlogna cun bucca averta ses tschic. Jau avess mustgas da far ina remartga en il stil da «voll-mega-crass-da-gangster». Ma en tals muments na dastg'ins betg surfar. Ins sto simplamain pudair taschair.

Mes mat tschertga egliers da sulegl nairs ed ina chapella e sa metta anc ina giada en posa davanti il spievel. Sco in gangster da Chicago. I manca be la pistola.

Uss è il dretg mument. «Prendas il mantè?»

«Mhm», è la risposta.

Jau giubilesch internamain. Eviva il gangster!



ILLUSTRATURA YVONNE GIENAL
WWW.YVONNE-GIENAL.CH

Il cudesch pon ins retrair online tar Lia Rumantscha www.liarumantscha.ch
(http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria